

Ilulissani Timersornermut ilinniarfimmik imaluunniit Ilinniarnertuunngorniarfimmik pilersitsoqarnissaa siunertaralungu Naalakkersuisut misissuinissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Knud Fleischer, Kattusseqatigiit Partiiat)

Saqqummiussinermut allakkiaq

(Ilinniartitaanermut, Ilisimatusarnermut Nunanullu Avannarlernut suleqateqarnermut Naalakkersuisoq)

Aappassaaneerpeqarnera

Ilulissani Timersornermut ilinniarfimmik imaluunniit Ilinniarnertuunngorniarfimmik pilersitsoqarnissaa siunertaralungu Naalakkersuisut misissuinissamik peqquneqarnissaannik Inatsisartut aalajangiiffigisassaattut siunnersuutip aappassaaneerpeqarneranut atatillugu Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap sukumiisumik isumaliutissiissutaa pillugu Naalakkersuisut qutsavigaat.

Naalakkersuisut maluginiarpaat ataatsimiititaliap isumaqatigiittup aalajangiiffissatut siunnersuummut allanguutissamik saqqummiussaqtut imatut oqaasertalimmik: *Ilinniartitaanermut Periusissiap II-ip suliarineqarneranut ilanngullugu Ilulissani Timersornermut ilinniarfimmik imaluunniit Ilinniarnertuunngorniarfimmik pilersitsoqassappat iluaqutaasinnaasut aningaasartuutaasinnaasullu ilanngullugit nalilersorneqarnissaannik Naalakkersuisut misissuinissamik peqquneqarnissaannik Inatsisartut aalajangiiffigisassaattut siunnersuut.*

Naalakkersuisut ataatsimiititaliap isumaqatigaat Ilulissani timersornermik ilinniarfimmik ilinniarnertuunngorniarfimmillu pilersitsinissamik periarfissat piumasaqaatillu sukumiisumik missornissaat pingaaruteqartoq, taamaalilluni pilersitsinnaanermik aalajangiinissamut tunngavissat tamakkiisumik paasinierneqassallutik. Tassunga ilanngunneqassapput taamatut misissuinermi aningaasartuutaasinnaasut misissorneqarnissaat tassungalu peqatigitillugu aningaasalersuinissamut periarfissanik innersuussineq. Naalakkersuisut naleqquttuusoralugulu tulluurtuusoraat Ilinniartitaanermut Pilersaarut II-p suliarineqarnerani taamatut misissuisoqassappat.

Naalakkersuisut ataatsimiititaliap aamma isumaqatigaat taamatut misissuinermi immikkoortut pingaaruteqartut tassaasut piffissami sivisuumi ilinniartitaanermi inuiaqatigiinnilu pisariaqartitat innuttaasut katitigaanerisa, inuit atugaasa suliamillu ingerlatsinerit isiginiarneqarnissaat paasiniaanermi nalilersuinermilu pingaaruteqartut. Taamaammat isumaqatigiittoqarpoq, siunnersuutip ilinniartitsinermut periusissiamut pingaarnertut sanilliunneqarnissaannik ataatsimiititaliap kaammattuuteqarmat, soorlu tamanna aamma Naalakkersuisut siullermeerinninnermi akissuteqaamminni erseqqissaraat, kisiannili aamma siunnersuutip inuusuttut atugarliuleriaannaat pillugit nassuiaammut, atuartut inaat pillugit nassuiaammut, taamaatiinnartartut pillugit 2010-mi misissuinermut aamma akiitsunut aningaasaliisarnermullu periusissiamut siunnersuutip misissuisinnaanerullu sanilliunneqarnissaat pillugu ataatsimiititaliap isumaa eqqarsaatigalugu.

Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap isumaliutissiissummi allappoq misissuinermi paasisat

saqqummiunneqassasut, taamaalilluni nutaamik ilinniarfiliortoqassagaluarpat aningaasatigut kingunissai qulaajarneqariissammata aamma immaqa aningaasanut inatsisit tullinnguuttut suliarineqarnerini tulleriiaagassanut ilanngunneqarsinnaanissaat eqqarsaatigalugu. Isumaliutit taamaattut Naalakkersuisut isumaqatigaat.

Naalakkersuisut taamatut oqaaseqarlutik aallannguutissatut siunnersuutip akuerineqarnissaa inassuteqaatigaat.